

Harian

Kutxabank → Administrazio Kontseiluaren osaketa

15 kideak

Mario Fernandez (BBK, EAJ)
Mikel Arieta-Araunabeña (BBK, EAJ)
Ainara Arsuaga (BBK, EAJ)
Begoña Atxalandabasa (BBK, EAJ)
Alex Bidetxea (BBK, EAJ)
Josu Ortuondo (BBK, EAJ)
Marivi Mendia (BBK, EAJ)

Jose Antonio Ruiz Garma (BBK, PP)
Luis Zayas Satrustegi (BBK, PP)
Xabier Iturbe (Kutxa, EAJ)
Jesus Mari Herrasti (Kutxa, EAJ)
Jesus Etxabe (Kutxa, EAJ)
Josu Arteaga (Kutxa, PP)
Carlos Zapatero (Vital, PSE-EE)
Fernando Raposo (Vital, PP)



Eztabaida kutxetako egituretan izan beharrean, berriro ere bulego politikoetan izan da»

ARALAR



Kutxabanke kontseiluaren profesionaltasuna bermatzen du EAJrekin egindako akordioak»

IÑAKI OIARTZABAL
PPko idazkari nagusia

Presaka, eta hankamotz

Hamabost kide izango ditu Kutxabankeko Administrazio Kontseilua: EAJk hamar proposatu ditu, eta PPK, lau

Bilduk eta PSE-EEK diote Kutxabank ez dela izango «errealitatearen isla»

Miren Garate Donostia

Azken orduan, presaka eta gizar-tearen zati adierazgarri bat kanpoan utzita. Hala osatu dute Kutxabankeko Administrazio Kontseilua. Integrazioarako kontratua aldatu eta Administrazio Kontseiluko kide kopurua hogeitik hamabostera jaistea erabaki zuten atzo BBK, Kutxa eta Vitaleko administrazio kontseiluek. Kopurua jaitsita, BBK-k bederatzigun izendatzea adostu zuten, Kutxak lau eta Vitalek bi —integrazio kontratuan jartzen zuten BBK-k hamabi, Kutxak sei eta Vitalek bi—. Alderdi politikak ez dira ados jarri bakoitzak izan beharreko pisuaz, eta EAJk eta PPK euren artean egin dute partiketa: EAJk hamar kide proposatu ditu, PPK lau eta azken aukia Carlos Zapatero Vitaleko presidente eta PSE-EEren ordezkariarentzat izan da, Kutxabankeko bigarren presidenteorde izateko. Erabakia gogor kritikatu dute Bilduk eta PSE-EEK.

Asteak eman dituzte negoziatzen, baina ez dira ados jarri. EAJk eduki beharreko pisuak eragin ditu ezadostasunak. Hark Kutxabanken gaineko kontrol osoa nahi du, eta horri lotutako proposamena egin zien gainerako alderdiei. Banaketa hau planteatu zuten: hogeitik hamar kide EAJk proposatzea —tartean presidentea, kalitateko botoarekin—, lau Bilduk eta PSE-EEK eta PPK hiruna. PP ados zegoen kopuruekin, baina beste bi alder-

diak, ez. Hala, herenegun arratsaldean haiek beste proposamen bat bidali zioten EAJri. Hogeitik bederatzigun hautatzea proposatu zioten, Bilduk bost kide eta PSE-EEK eta PPK hiru izatearen truke. Proposamen berean, luze-za begira Administrazio Kontseilua 22 lagunera igotzea nahi zutela zioten. Hori egindakoan, EAJk hamar kide, Bilduk bost, PSE-EEK lau eta PPK hiru izango zituztela zioten. EAJk ez zuen onartu proposamena. Hori dela tea, PSE-EEK eta Bilduk esan zuten EAJk gehiengo osoari uko egin ezean ez zituztela izendatuko euren ordezkariak.

Heldu, eta ezustekoa

Testuinguru horretan iritsi ziren atzoko administrazio kontseiluek. Bazirudien EAJk hamar lagun aukeratuko zituela, PPK hiru, eta gainerako zazpi eserlekuak bien artean aukeratutako zazpi profesional independente-entzat izango zirela. Alabaina, beste behin ere, ezustekoak izan dira nagusi. «Kontseilura iritsi garenean, ikusi dugu lehen puntua integrazio kontratuaren aldaketa zela», esan du Josu Ruizek, Kutxako Administrazio Kontseiluko kide eta Bilduko ordezkariak.

Ez zekiten EAJk eta PPK Administrazio Kontseiluko kide kopurua murrizteko asmoa zutenik. Integrazio kontratua era horretan aldatzea legezkoa den aztertuko dutela esan du. Ruizen hitzetan, «etsita» geratu dira ikusita-



BBKren batzarra, bat egitearen gaineko eztabaida egin zutenean. MONIKA DEL VALLE / ARGAZKI PRESS

koarekin. Aldaketarekin galtzailenagusia Kutxa izango dela azaldu du, sei ordezkari izan beharrean lau izango dituelako. Vitalek lehen bi zituen eta orain ere bai. Kutxabankeko Administrazio Kontseiluari eskatu dio ez ezala erabaki garrantzitsurik hartu.

PSE-EEren esanetan, «Kutxabank *Batzokibank* bihurtu» nahi izan du EAJk. Jose Antonio Pastor alderdiaren Eusko Legebiltzarreko bozeramaileak azaldu du «oker politiko larria» egin dutela EAJk eta PPK. «Ezinbestekoa zen Kutxabankeko Administrazio

Kontseilua Euskadiko errealitatearen isla izatea».

Andoni Ortuzar EAJko Bizkai Buru Batzarreko lehendakariak, aldiz, adierazi du «Euskadirentzat egun garrantzitsua» izan zela atzokoa. Dena den, Bildu eta PSE-EE ere kontseiluan egotea

9 » «Gardentasunez» aritzeko, euren ondasunen berri eman dute PSE-EEko legebiltzarkideek

17 » Iranen eta AEBen arteko tentsioa areagotu du Hormuzko pasabidea ixteko mehatxuak

Kutxabank → Administrazio Kontseiluaren osaketa



Hau al da EAJk, Bilduk, PSE-EEK eta PPK saldu ziguten herrialderako proiektu handia?»

MIKEL ARANA
Ezker Batuko legebiltzarkidea



Administrazio Kontseilua edozein izanda ere, Kutxabank ondo kudeatuta egongo da»

MIGUEL ANGEL LUJUA
Confesbaskeko presidentea

4

■ **Laugarren saioa.** BBK-k, Kutxak eta Vitalek bat egiteko asmoak 1990eko hamarkadakoak dira. Bat egiteko hiru saio serio izan ziren, 2005ean, 2007an eta 2008an, baina porrot egin zuten, arrazoi ekonomikoengatik baino gehiago, interes politikoengatik.

LABek negoziazio mahaira deitu du astelehenerako

LABek Araba, Bizkai, Gipuzkoa eta Nafarroako Kutxabaneko mahaia osatzeko eskaera egin die gainerako sindikatuei eta zuzendaritzari. Bilerara deitu du astelehenerako. Mahaia osatu ondoren, langileek kontsulta egitea proposatuko du, zer negoziazio eremu nahi duten erabaki dezaten.

nahi zutela dio. «Ezinezko gertatu da. Nahiago izan dute parte ez hartu. Ez dute ulertu nahi izan hau ez zela parlamentu edo gobernu bat osatzeko negoziazio bat. Hau banku baten administrazio kontseilu bat osatzeko zela». Etorkizunari begira, irekita dagoela PSE eta Bildu Kutxabanken sartzeko bidea gaineratu du. 15 kideko kopurua Espainiako Bankuak aholkatzen du, Ortuzarren arabera.

Kutxen legearen zain

Osatuta dago jada erakunde berriko aginte organoa, baina ez dago argi noiz arte jardungo duen lanean. Izan ere, aurrezki kutxen lege berria jarri nahi du martxan Eusko Jaurlaritzak. Otsailan edo martxoan onartzea espero da. Lege horrek kutxen gobernu organoetan erakunde publikoek duten ordezkaritza %40ra mugatzen du, hau da, aginte organoak «profesionalizatu» egin nahi dira, nahiz eta oraingoan izan diren gorabeherak ikusita sinesgaitza dirudien.

Legea indarrean sartzean kutxek oso-osorik berritu beharko dituzte batzar orokorrak eta administrazio kontseiluak. Ondoren, gauza bera egin beharko da Kutxabaneko Administrazio Kontseiluan. Teorian lau urterako izendatu dituzte kontseiluko kideak, baina, horretarako, batzarren babesa behar dute. Legea indarrean jartzeko hauteskunde-etako emaitzak hartuko dira kontuan; hala, EAJk indarra galduko du eta Bildu guztietan sartu ahal izango da. Beraz, oso litekeena da orain izendatutako kideek ez izatea batzarren onespentik.

EAJk helegitea jarri du legearen aurka, eta arbitraje batzordearen esku dago kasua. Horrek atzeratu egin du legea indarrean jartzeko eguna, berez Kutxabank sortu aurretik onartu nahi baitzuten. Dena den, legea indarrean martxoan baino geroago sartzen bada ere, kontuan izan behar da kutxetako batzarrak berritzea tokatzen dela laster: martxoan BBKn eta Vitalen eta apirillean Kutxan. Batzarkideen erdiak berritu beharko dituzte, eta horrek ere izango du eragina Kutxabaneko Administrazio Kontseiluan.

Astelehenetik, elkarrekin, handitzen jarraitzeko helburu argiarekin

Urte berriarekin batera jarriko da martxan Kutxabank; dena den, prozesua amaitzerako 2013a izango da

M. Garate Donostia

Martxoaren 23an iragarri zuten BBK-k, Kutxak eta Vitalek bat egite hotzerako akordioa lortu zutela, hau da, hiruren finantza negoziarioa banku batean bilduko zutela eta haren jabetza partekatuko. Helburua tamainaz haztea zelazaldu zuten, «atzean ez gertatzeko, merkatu berrietan sartzeko, bezeroei produktu eta zerbitzu hobeak eskaintzeko eta gizarte ekintza bultzatzeko». Iragarpen hura egin zutenetik forma hartuz joan da proiektua. Kutxabank izena jarri diote erakunde berriari, eta administrazio kontseiluek eta batzarrek oniritzia eman diote; beste hari batzuk lotzeko daude oraindik; lan arlokoak, kasu. Urte berriarekin batera sortuko da erakunde berria, baina jaipeguna izaki, hurrengo egunean hasiko da lanean.

Zertarako egin dute bat hiru kutxek?

Hiru kutxen kaudimen egoera ona izan da orain arte, eta erraz gainditu dituzte jarritako probak. Alabaina, finantza sistemaren gainean mesfidantza handia dago, eta kutxen birmoldatzeari helteza erabaki zuten Espainiako Gobernuak eta Espainiako Bankuak. Erakunde gero eta handiagoak geratzen dira merkatuan, eta tamaina handitzea izan da kutxen helburu nagusia ere. Hala, lehiakorragoak izango direla diote, eta bezeroentzat ere onuragarria izango dela hori.

Zer tamaina izango du Kutxabankek?

Hego Euskal Herrian eta Espai-

nian lehiatzen den zortzigarren finantza erakunde izango da. 75.729 milioi euro izango ditu aktiboetan, eta bi mila milioi eurotik gorako kapitala. 1.300 bulego edukiko ditu, eta bederatzi mila langile.

Baina zergatik banku, eta ez kutxa?

Xabier Iturbe Kutxako presidentek Martin Ugalde foroan azaldu zuenez, Espainiako Bankuaren araudiak horretara behartu ditu, Espainiak aurrezki kutxak desagertzeko konpromisoa hartu duela Europar. 2008an 45 kutxa zeuden Espainian eta Hego Euskal Herrian, jada hamalaura jaitzi da kopurua, eta gehienek banku egitura hartu dute.

Banku bihurtzeko zer ondorio izan ditzake?

Teorian pribatizaziorako bidea irekitzen du. Dena den, bat egiteari babesa emateko baldintza gisa, hainbat konpromiso lortu zituen Bilduk kutxekin. Akordioaren arabera, kutxa batek zati bat saldu nahi badu, hiru kutxetako batzarrek onartu behar dute salmenta. Berez, gainerako kutxek izango dute akzioak erosteko lehenetasuna, baina nahi ez edo ezingo balute, batzarren esku geratuko litzateke kanpoko norbaiti saltzeko aukera. Adostutakoak ez ditu guztiak konbentzitu. ELA eta Aralar, kasu, bat egitearen aurka agertu dira. ELAren esanetan, kutxek eta Bilduk hitzartutako testuak ez dituen erabat itxen pribatizaziorako ateak, «erakundeek edo administrazioek kontrakoa eskatzen badute» jarri zuten duela testuan.

Nork aginduko du Kutxabanken?

BBK-k %57ko pisua izango du erakunde berrian, Kutxak %32koa eta Vitalek %11koa. Mario Fernandez izango da Kutxa-

bankeko presidentea, Xabier Iturbe presidenteordea eta Carlos Zapatero bigarren presidenteordea. Orain artean BBK-ko, Kutxako eta Vitaleko presidentek ziren, hurrenez hurren. Ignacio Sanchez Asiain izango da zuzendari nagusia eta bankuaren negoziario arduratuko da —orain artean BBK-ko zuzendari nagusia zen—. Zuzendari nagusi ondokoak Vitaleko eta Kutxako zuzendari nagusiak izango dira: Joseba Barrena eta Fernando Martinez-Jorcana. Erabakiak hartzeko gutxienez bi kutxak ados egon beharko dute, eta horietako bat BBK-k izan beharko du.

BBKren pisu handiak zer eragin izango du?

Erakunde bakar bat osatu eta Bilbon jartzeak zergatan zer-nolako eragina izango duen zen beste zalantzetako bat, Kutxek ekarpen handia egiten dietelako ogasunei. «Neutraltasunez» jokatzeko adostu dute, bakoitzaren pisuaren arabera, norbere herrialdean ordaintze zergak. Gizarte ekintzaren kasuan ere hala izango da: kutxa bakoitzaren portzentajea erabiliko da. Esaterako, irabazien %57 zenbat den ikusiko da, eta kopuru horren %30 gastatuko du BBK-k gizarte ekintzan. Gizarte ekintza kutxa bakoitzak kudeatuko du, bere lurraldean.

Lan baldintzetan izango al da aldatetarik?

Hasiera batean, ez. Langile bakoitzak orain arte zituen baldintzekin jarraituko du, eta langile berriek BBK-ko akordioa aplikatuko zaie. 2013a amaitzerako parekatu nahi dira hiru kutxetako lan baldintzak. Orduetako dagokienez, 2012ko urritik aurrera BBK-koetara egokituz joango dira. Neurri traumatikorik ez dutela hartuko agindu dute kutxetako arduradunek. Langileak soberan izanez gero, pizgarri bidezko kaleratzeak izango dute lehenetasuna. Lan

egindako urte bakoitzeko 55 egun ordaintzeko prest agertu dira kutxak, gehienez ere 45 hilabeteko mugarekin. Erretiro aurreratuen kasuan, langileek gutxienez soldata gordinaren %75 kobratzeko konpromisoa hartu dute.

Zein negoziazio eremu erabiliko da?

Bilduk eta kutxek adostu zuten langileek erabakiko zutela Espainiako edo Euskal Herriko negoziario eremua aukeratzeko. Ez dago argi Hego Euskal Herriko langileen iritzia bakarrik hartuko den kontuan ala Espainiakoe- na ere bai.

Amaitu da bat egitea?

Ez, oraindik ez. Prozesu guztia amaitzerako 2013a izango da. Azken urratsa bateratze teknologikoa izango dela aurreikusten da.

Etorkizunera begira, zer?

Mario Fernandez presidentek argi eta garbi esan du hazten jarraitu nahi dutela. Bi urteko epean gaur egungo aktibo kopurua bikoizteko helburua ere jarri du Nola? Erakunde berriak eskuratu.

Bezeroek zer igarriko dute astelehenean?

Aldaketa handirik ez, ohiko bulegoak mantenduko dira, eta orain arteko txartel eta liburuxkekin egin ahal izango dira eragiketak. Itxura aldetik, orain arteko logoei jarraituko dute, baina Kutxabankena ere agertuko da. Praktikan, ordea, hainbat sailek dagoeneko bateratuta funtzionatu dute, altxortegiak, finantza aholkularitzak eta giza baliabideek esaterako. Abantailen artean, komisioko kendu izana da bat. Hiru kutxetako bateko bezero denak ez du ordaindu beharrik izango beste bietan eragiketarako egiteko.